

四庫全書

集部

欽定四庫全書

石倉歷代詩選卷一百四十一

明 曹學佺 編

宋詩十八

梅堯臣

和謝希深會聖宮

三后威靈遠層巒棟宇興衣冠漢原廟歌舞魏西陵日  
月融光盛山河王氣增叢楹琢文石連網絡朱繩碧瓦

寒鋪玉重欄瑩鏤氷粹儀神霧擁法袞繡龍升星斗羅  
容衛軒墀侍股肱宸蹤耀璇榜瑞羽集觚稜闕殿深珠  
箔雕垣界綺縢笙從緱嶺咽雲傍帝鄉凝龜組恭來詣  
貂璫肅奉承欲知歸厚意孝德自烝烝

右丞李相公自洛移鎮河陽

侯服齊三輔天臺聳百僚新草刻銅虎舊德冠金貂已  
作歌襦化方期執玉朝雙韃辭洛宅千騎向河橋鼓角  
春城暮鶯花故苑遙瓜亭猶接畛棠茇自敷條夾道都

人擁迎風四牡驕莫隨文學乘空望旆旌飄

遊龍門自潛溪過寶應精舍

遙愛夏景佳行行清興屬安知轉迴溪始覺來平谷古  
殿藏竹間香庵遍巖曲雲霞弄霽暉草樹含新綠時鳥  
自綿蠻山花競紛縟莫言歸路賒明月還相續

嶺雲

片雨過青天山雲歸絕嶺林際隱微虹溪中落行影還  
看隴首飛復愛山間靜

垂澗藤

寒松偃澗濱弱蔓垂纓綠波縈翠帶長水濺低花馥終  
日採蘋人攀條映巖曲

田家

春

昨夜春雷作荷鋤埋南陂杏花將及候農事不可遲蠶  
女亦自念牧童仍我隨田中逢老父荷杖獨熙熙

其二

夏

草木遶籬盛田園向郭斜去鋤南山豆歸灌東園瓜白

水照茅屋清風生稻花前陂日已晚聒聒競鳴蛙

春日遊龍門山寺

還邀二三子共到鑿龍遊陰壑泉初動春巖氣欲浮竹  
藏深岫寺人渡晚川舟始覺山風急歸鞍不自留

少林寺

紅旌過翠岑林際瞻蓮宇門對幾千巖花開第一祖禪  
庭松色寒石室苔痕古寂寂不逢人空簷燕方乳

同尹子漸王幾道訪郭三別墅不遇

秋野已澄曠偶來幽興多  
茨居隔寒水柴戶蔭喬柯  
看竹曾留鳳攜朋不為鶩  
人歸碧苔徑應識履痕過

王氏昆仲歸寧

昨夜雪霏霏梁山吟未歸  
關河誰道遠鴻雁自相依  
落日人煙少寒雲驛路微  
共將彭澤酒稱壽向庭闈

環州通判張殿丞亢

欲向蕭關外窮陰雪暗沙  
磧寒鴻雁少冰合水泉賒  
自有從軍樂應無去國嗟  
春風曾不到吹角寄梅花

梅花

似畏羣芳妬先春發故林曾無鶯蝶戀空被雪霜侵不  
道東風遠應悲上苑深南枝已零落羌笛寄餘音

留題希深美檜亭

幽深有佳趣曾不減林泉衆綠經新雨殘紅墮夕煙栽  
萱北堂近夢草故池連來月時來往清歌思浩然

新秋雨夜西齋文會

夜色際陰靈燈青謝客齋梧桐生靜思絡緯動秋懷小



酌寧辭醉清言不厭諧誰憐何水部吟苦怨空階

秋陰

已過蕭蕭雨猶成黯黯陰登臨潘岳思惻惻楚臣心遠  
吹鳴高樹低雲冒晚岑久為關外客不忍聽疎砧

雨中移竹

荷鋤冒秋霖忽忽移翠竹欲分溪上陰聊助池邊綠中  
散林未開子猷心已足青青謝栽培豈愧凡草木

河陽秋夕夢與永叔遊嵩避雨於峻極院賦詩

及覺猶能憶記俄而僕夫自洛來云永叔諸君  
陪希深祠岳因足成短韻

夕寢北窓下青山夢與尋相歡不異昔勝事却疑今風  
雨幽林靜雲煙古寺深攬衣方有感還喜問來音

依韻和永叔雪後見寄兼云自尹家兄弟及幾  
道散後子聽下縣久不得歸頗有離索之嘆

常欲登芒嶺無由見洛橋雪飛關戍迴人憶剡溪遙廣  
隰嘶征鴈長河起怒飈遽言歡會散能使客魂銷晚日

窮幽藹愁雲暝沈寥縱令佳約在載酒定何邀

季父知并州

捧詔出明光飛軒陟太行玉墀分近侍虎綬給新章  
笳吹喧行陌旌旗卷夜霜鴈歸汾水綠城壓代雲黃  
土屋春風峭羶裘牧騎狂關山寧久駐剌宴柳谿傍

再至洛中寒食

西洛逢寒食依依似昔年十門分禁火九野自生煙  
飄泊梨花雨追隨杏葉韉遊人莫惜醉風景滿伊川

登太室中峯

日夕望蒼崖  
峩峩在天外  
及來步其巔  
下見河如帶  
半壁雲霧昏  
山根已霧霈

峻極寺

山高路已窮  
倏爾逢蘭若  
落日老僧閒  
支頤古松下  
緩步入禪庭  
苔蒼但蕭洒

送弟良臣歸宣城

喬木句溪邊  
秋光幾曲連  
將歸三畝宅  
遠寄下江船  
伴

爾惟征鴈悲余有暮蟬親朋如見問貧外似當年

劉秀才歸河內

君家太行下應復近蘇門河氣知寒早嵐煙覺暮昏犬  
鳴林外火笛響月中村久作山陽客逢人為寄言

武陵行

生事在漁樵所居亦煙水野艇一竿絲朝朝狎清汎忽  
自傍藤陰乘流轉山背始覺景氣佳潛通小谿裏常時  
不見春入谷鶯花蘂幽興窮綠波翫芳心莫已花外一

峰明林間碧洞啓遙聞雞犬音漸悟人煙邇

鄭戡及第東歸後赴洋州幕

卻生方得桂王粲始從戎一舸辭吳會單車入漢中亂  
山雲木古側徑野泉通欲識風煙美心知故國同

楊畋赴官并州

嘗聞地近塞寒氣盛中都車馬行臨塞關山見落榆吳  
鉤皆尚壯章甫幾為儒寄謝西曹掾能吟秀句無

明州推官鄭先輩

應幕海邊郡秋風千里歸隨潮吳榜駛轉浦楚山微野  
橘霜前熟江螯露下肥還家候靈鵲人想罷鳴機

僧可真東歸因謁范蘇州

仲淹

姑蘇臺畔去雲壑付清機野策過寒水山童護衲衣松  
門正投宿竹笠帶餘暉誰愛村山句使君應姓韋

廖秀才歸衡山縣

千里倦為客秋歸烏榜輕過林湘橘暗收潦楚江清晚  
泊親鷗鷺殘芳襲杜蘅長沙幾日到天際見高城

舟中聞蛩

秋月滿行舟  
秋蟲響孤岸  
豈獨居者愁  
當令客心亂  
展轉重興嗟  
所嗟時節換  
時節不苦留  
川涂行已半  
霜落草根枯  
清音從此斷  
誰復過江南  
哀鴻為我伴

望夫山

亭亭千古質  
曾是念征夫  
一作山頭石  
畏省天際途  
猶如託蘿蔓  
不似采薜蘿  
時有江雲近  
仙衣挂六銖

泊牛渚磯



落帆牛渚前便為牛渚宿波搖殘照中采翠浮巖谷巖  
谷足幽篁石上羅寒玉裁作媧氏笙堪作鳳凰曲楚客  
夕無眠獨將清籟續更看江月來還想燃犀燭

池州進士陳生惠然見過不日且行因以詩贈  
別

呼童具雞黍頗識故人期竹館忽停駕山樽聊解頤醉  
歌返北郭春雨生東陂便與千峰隔登高空復思

春陰

濃淡雲無定，淒微氣宇寒。  
鳩鳴桑葉吐，村暗杏花殘。  
客子行裘薄，春塘野水寬。  
輕雷欣已發，謬作採茶官。

百舌

天窓明未明，颯颯過微雨。  
已聞高樹頭，百舌間關語。  
幽人枕上聽，不徹變盡春聲。  
始飛去。

挾彈篇

長安細侯年尚少，獨出春郊不須曉。  
手持柘彈霸陵邊，豈惜金丸射飛鳥。  
金丸射盡飛鳥空，解衣市酒向新豐。

醉倒銀餅方肯去去卧紅樓歌吹中不管花開與花老  
明朝還去杜城東

答陳五進士遺山水枕屏

妙畫能成趣谿山迥得君漁舟長映浦巖樹半藏雲征  
鳥無時沒橫橋缺處分數峰來枕席曾不愧移文

訪礪坑老僧

山深無外事日夕愛潺湲趺坐樹間石力畔谿上田解  
言南國事能詠碧雲篇莫貫遠公酒深慚陶令賢

詠官妓從人

少為輕薄誤失行落優倡去作小家婦願同貧里裝無  
心歌子夜有意學流黃他日東郊上誰人見採桑

寄饒州范侍制

山水番君國文章漢侍臣古來中酒地今見獨醒人坐  
嘯安浮俗談詩接上賓何由趨盛府徒爾望清塵

野田行

輕雷長陂水農事乃及辰茅旌送山鬼瓦鼓迎田神青

臯暗藏雉萬木欣已春桑間偶耕者誰復來問津

弔礦坑惠燈上人

生棲雲際巘沒葵寺傍村破案殘經卷新墳出樹根松  
悲隔溪路月照舊山門自昔多詩句而今幾許存

送蔡侍禁赴長沙

寒葉下瀟湘之官逐鴈行水經菱浦晚船過橘洲香二  
女竹林外三閭楓葉傍平時息戎律物景助才章

送余駕部江州

內史九江行潦收波已清何時鷁舟上遠見爐峰迎野  
色連葭蒹秋香薦橘橙寒潮如特送不肯過湓城

九月都下對雪寄永叔師魯

陰風中夜鳴密雪逗曉積誰言有蓬巷但見鋪瑤席忽  
憶在山中開戶羣峰白當時吟不厭盡日坐巖石徬徨  
懷故人憔悴為遷客欲泛剡溪船路長安可適

送胡臣秀才

汴水日夜淺歸船不可留天高雲就嶺地冷鴈迴洲江

館魚堪食家林橘已收平生素業在莫見里人羞

送張秀才之淮南

聊為楚客唱一送淮南行出汴遠心喜移舟孤岫橫危  
帆將進浦寒霧不分城枚乘舊居處向來秋草生

依韻和子聰見寄

常念餞行舟風蟬動去愁獨登孤岸立不見遠帆收及  
送故人盡亦嗟歸跡留洛陽君更憶寧復醉危樓

送何遜山人歸蜀

春風入樹綠童稚望柴扉遠壑杜鵑響前山蜀客歸到  
家逢社燕下馬澣征衣終日自臨水應知己息機

寄衡山福嚴長老

衡山幾千里聞在湘川側雲霞不可到峰壑無由識方  
丈開其間青松隱寒色飛鴻尚莫過况寄雙鳬翼

新霽登周王城

行行古城頭歷覽古城下水鳥傍人煙河流隔桑柘秋  
山豁晴翠野老親時稼民訟今已稀間登厭官舍



送李康伯赴武當都監

城下漢江流滄波照鬢秋山川包楚塞風物似荊州試  
聽清砧發何如畫角愁遙知絕戎事水味別槎頭

重送

得朋如得寶何恨相知晚舊友貴來疎嗟君行復遠秋  
城隔寒水驛路入蒼巖古情深不深所祝如餐飯

古塚

南陽道中作

南陽古原上荒塚若魚鱗劍佩已為土衣冠應化塵枯

骸托魑魅細草沒麒麟何必問名氏漢家多近親

和師直早春雪後五隴道中作

來尋谷口春正值陰雲結日暮氷霰繁宿亭孤飯設侵  
晨登隴去始見羣峰列草凍未抽心松枯猶抱節川傍  
認飛鷺林上墜殘雪何意待芳菲遲留未堪折

依韻和師直晚步徧覽五隴川

窮覽川原勝經行未厭頻樵深但聞斧谷暖自留春臨  
水何妨坐看雲忽滯人誰家煙塢裡竹樹遠相鄰

暮春過洪氏汝曲小園

三月花已休間來羨叢薄河回地勢偏雨入灘聲惡綠  
草旋抽心青梅猶帶萼主人歸未歸誰省曾遊樂

登許昌城望西湖

試望許西偏湖光浸曉煙岸痕添宿雨草色際平田夏  
木陰猶薄朱荷出未圓人間綠波靜幽鷺挿頭眠

夏日晚晴登許昌西湖

新晴萬柳齊鶯度水東西城上明殘照雲間挂斷霓煙

蒲勻若剪沙岸淨無泥巢壓繁枝重人乘小駟低嵐光  
開翡翠湖色浸玻瓈惹袖朱藤密如過罨畫谿

古相思

劈竹兩分張情知無合理織作雙紋簾依然淚花紫淚  
花雖復合疑岫幾千里欲識舜娥悲無窮似湘水

望仙亭

并敘

壽春望仙亭廣平宋公所作也宛陵梅堯臣之官  
吳興道出其下公命賦之

公來有餘樂所樂為郡閒訟稀聊自適靜勝以抒顏清  
軒閒曉幔歷歷見淮山山色洗新雨佳氣如可攀代異  
雞犬去時平草木閑試望天衢近飛駕應此還

淮上雜詩

野鴈不知數翳然川上鳴曾無設羅意空自見船驚渺  
渺拍波去紛紛孤嶼盈苦寒非塞外霜落夜淮清

赴甯任君有詩相送仍懷舊賞因次其韻

湖山饒遠處曾省牧之遊鴈落葑田閣船過菱渚秋野

煙昏古寺波影動危樓到日尋題墨多應舊壁留

金山寺

吳客獨來後楚橈歸夕曛山形無地接寺界與波分巢  
鶻寧窺物馴鷗自作羣老僧忘歲月石上看江雲

甘露寺

曾非遠城郭寂爾隔囂氛尚有南朝樹能留北固雲川  
濤觀海若霜聲入江漬衛國丹青在孤堂綠桂薰

依韻和刁經臣讀李衛公平泉山居詩碑有感

當時植珍木豈是昧前規廢宅長春草故山存舊碑已  
嗟良壁毀安識古松姿叔子每懷慕此心空自知

移竹

遠愛檀欒碧逕開荷鋤東雨破秋苔直須探作阮家趣  
更向煙林缺處栽

依韻答淮南祝秘校初春見寄

客有袖中書初憑春燕寄春燕不時來秋鴻今始至水  
落蒲藻寒悠悠江浦意

依韻和僧說上人見訪

客從東度來山雲猶在屨是時正窮臘鴈落溪陰暮投  
宿古城頭雪迷松下路衣楮足蘭荃相遇寧厭屢

送劉比部

青山夜來雨溪水已潺湲侵曉桂旗動傷離蘋渚前百  
壺臨祖道兩槩破春煙舊業西河上歸心落日邊

雪上

共愛雪溪風物美春來清可鑑鬚眉萌生楚客將歸日



花暖吳蠶始浴時  
臨水竹樓通市陌  
跨橋雲榭接川湄  
畫船載酒期君醉  
欲學山公倒接羅

謝尉西歸

曾為洛陽客  
喜見洛陽人  
每憶舊遊處  
相逢借問頻  
當時伊水上  
醉弄巖花春  
今違茲樂久  
欲語已酸辛  
明朝君當去  
又復與誰親  
惟應有素月  
相照寒溪濱

送逐客王勝之不及遂至屠兒原

犯霜出國門  
送客客已去  
猶意行未遠  
策馬過寒戍  
川

長不見人沙沒前岡路始聞雲木深忽逢朱亥墓金鉞  
一報恩義烈垂竹素何須文學為寄語長沙傳

郡閣閱書投壺和呈相國晏公

較量人世無窮樂羅列平生未見書聊奉投壺祭征虜  
休言擊劍馬相如畫樓晚去聞寒角縹帙春來落蠹魚  
日奉誨言猶未飽不慙貧賤帶經鋤

擬張九齡詠燕

眇眇飛來燕長年與社違任從新歷改只向舊巢歸永

日當人語輕寒逆雨飛自親梁棟慣不識海鷗機

送詹彥迪祕校之越

夙懷山水心夢寐向東越聞為會稽行獨此羨明發渡  
江信春潮泊館食野蕨漫續梁鴻噫浩歌鏡湖月

晨起裴吳二直講過門云鳳閣韓舍人物故作  
平生交友淚流向禁門前魯叟不言命楚人空問天月  
沈滄海底星隕太微邊莫恨終埋沒文章自可傳

送徐君章秘丞知梁山軍

蒼壁束江流孤軍水上頭蛟龍驚鼓角雲霧裏衣裘午  
市已姑集危灘楚客愁使君才筆健當似白忠州

依韻和秋夜對月

陳王苑裡望空虛吳客風前憶具區橫閣漸看河影轉  
繞枝還見鵲驚無蟲催織婦機成素露逼鮫人淚作珠  
才比陶潛無用處角巾時任酒沾濡

依韻和仲源獨夜吟

秋鴻聲澀秋絃苦塗金博山煙夜吐寂歷虛堂燈暈生

誰人共聽西窓雨

十三日雷後晚過天漢橋堤上行

堤上殘風雪橋邊盛酒樓  
據鞍衰意盡倚檻艷歌留  
海月開金鑑河水卧玉虬  
當年洛陽醉偏憶董糟丘

送婺州通判徐殿丞

疾湍怒蛟龍不畏東風逆  
沄沄奔長淮千里在咫尺  
辭梁始及晨過宋尚未夕  
南州豈難到何處淹行跡

雨

春雲易成雨一日幾迴陰燕濕飛猶快花寒色更深邀  
車愁客遠盤馬畏泥侵向晚晴光吐西窓綠影臨

次韻和端式見贈

不為阮步兵詠懷怨朝陽寧學屈大夫行吟思蹇芳其  
雨豈無時紉佩空自香吾道不苟合我懷固有常江南  
一畝宅近在句溪旁仕宦且如此夢寐安敢忘

雪竇山

重雲不藏春深竇常有雪曉月號松猿晴壁挂海電終

恍無心人區區佩環玦

偃蓋亭

既將茅覆簷復有松為蓋五里入山時憇此得寒籟曾  
無康樂游但見雲衲會

雲外庵

山僧好寂靜入雲恨不深峰間一雨昏林表孤燈沈往  
來有猿狖呼嘯自成音

昭君詞

一嫁異域去不復臨鏡臺念昔辭家時豈為單于來適  
遐固亦命事虜非由媒始欲並日月今嗟隨風埃僕御  
共慘戚山川空徘徊鴻鴈為之悲肝腸為之摧寧聞琵琶  
樂誰喜羶廬開故國萬餘里此生那得回

送趙虞部士宏知蜀州

春風跨臘至雪作蝴蝶飛偏知蜀太守撩亂撲行衣何  
當海棠下歌管紅袖圍一飲一斗酒決訟如發機洛陽  
花自好聽從杜鵑歸



次韻和景彞閏臘二十五日省宿

君常納史似吳兢又直甘泉馬踏冰重臘雪花方漫漫  
宿廳書架自層層案頭美酒初溫火簾底微風欲動燈  
永夜未眠鐘已發此心間寂是高僧

次韻和永叔

省樹高槐雪壓條沈沈古屋蔽疏寮每嗟守印如枯木  
欲棄明珠學緯蕭漸老但知貧賤樂向來徒用歲時銷  
新年不管魚龍躍安得乘風入剡樵

送祖擇之赴陝府

古來分陝重，聞有召公棠。此樹且能久，後人宜不忘。  
驂從金馬去，郡倚鐵牛旁。山色臨關險，河聲出地長。  
樽無空美酒，魚必薦嘉魴。天子憂民切，行當務勸桑。

次韻和永叔對雪十韻

玉月梨梅柳  
絮幸皆不用

紛紛何亂目，凜凜自開門。著莫風難定，侵凌物已繁。  
裝成新樹色，沒盡古苔痕。冷入梁王苑，清乘衛國軒。  
欺貧凍蓬華，增險想輾轅。小隙皆能及，洪爐逼不溫。  
雲衣隨

處積水甲等閒屯團戲為九轉堆雕作獸蹲豈愁穿破  
履幸喜有清樽誰問諸公子高樓與後園

送李灝秀才南歸

乘驢雪中來別我千里歸江南梅花發身與越鳥飛幾  
年客大梁著盡篋中衣空餘一束書去恨知者稀

送李閭使知冀州

腰裏黃金絡春風北渡河將軍守漢法壯士發燕歌綠  
水塘蒲短晴天塞鴈多家聲復年少矍鑠笑廉頗

聞王景葵雪中禱祀還

二月漫漫雪齋宮夜寂寥壇場祠乙鳥桑柘響陰杲履  
帶春泥重駒回廣野騎還批五色詔池上踏瓊瑤

續永叔歸田樂秋冬二首

秋風忽來鳴蟋蟀豆葉半黃陂水枯纖婦夜作露欲冷  
社酒已熟人相呼坎坎擊鼓坐林下醉去自有兒童扶  
壯男獨獵南山虎中子已扳荒徑孤田家此樂樂有餘  
食肉緝皮裘豈無我愛從之乏寸土待買短艇歸江湖

北風如刀割寒骨穀已成困不蒼猝任從密雪落交加  
旋採乾薪燒梢杻鋤犁滿屋牛在牢鵝鴨亂鳴雞亂發  
割烹炊黍待鄰叟飽向茅簷間兀兀田家此樂樂無涯  
誰道一生空汨沒公希平子定何如我效梁鴻終適越

孫司諫知鄧州

南陽漢名都其俗尚敦樸亡徒頊為盜刺史安與角田  
野遂焦熬蓬萊思沃濯茲乍飲甘露向已苦風電更張  
固所重下令宜未數且觀道傍碑文字今已剥

宋次道一百五日往鄭拜墓

去不避春雨泣望松柏門  
颯然風悲響如感泉下魂  
沃醑向墳土空濕陳草根  
人歸夜月冷石馬在九原

寄靈隱通教僧

奇山青若洗草木生石上  
根萌不可窮條蔓自增王  
其陰有高僧日食惟一盞  
世人久已疎猿鳥應相向

和中道雨樹

一旬苟不雨萬木昏蒼蒼  
朝見洗林葉動搖生輝光  
晚

逢開疎陰枝上漏微陽翠色固以好安得無秋霜

寄永叔

夏日永以靜渴烏方在枝張口不能言翕翕兩翅披庭  
中有井泉井深無綆縻欲汲假其鄰鄰且非我知鴻鷗  
矯河上比爾得所宜得宜豈不樂胡言我念之

和李廷老三月十四日

三月日幾望士游漆水陽漆流已渙渙有美此朝翔偶  
來適此願茲焉繼篇章士將陟少室女曰歸大梁及晨

各異役悲喜竟回腸芍藥有遺風贈好期不忘

送鄭太保瀛州都監

秋氣入關河匈奴久已和  
凋弓聊可試寶劍不須磨  
草木將搖落牛羊自寢訛  
誰知塞垣景持以贈君歌

和張士曹應之晚景

遠空雲解駁南陌雨初收  
獨鳥去煙外斜陽明樹頭  
涼飈虛枕席漲滂起汀洲  
會有從軍役將離更暮愁

過開封古城



荒城臨殘日雞犬三四家  
豈復古阡陌但問新桑麻  
頽垣下多穴所窟狐與蛇  
漢兵墮銅鏃青血為土花

秋夜感懷

風葉相追逐庭響如人行  
獨宿不成寐起坐心屏營  
哀哉齊體人魂氣今何征  
曾不如隕穉繞樹猶有聲  
涕淚不能止月落荒雞鳴

和平叔道傍竹

野田有修竹叢疎飽于霜  
下上乏佳禽左右雜枯桑  
豈

無行路子行路厭榛荒忽見此翠色徘徊未能忘車馬  
去何疾迴顧隔山岡

暮雪

暮雪止復落暗積如避人平明視庭中物象各已新草  
木一變妍枯槁忘其真隨風來無迹高下得以均采薇  
歌卒章霏霏霑車輪今豈無是作勞苦不足陳

西湖對雪

獨玩湖中雪移舟水凍灣寒塘起孤鴈危樹失前山著

物偏能積衝風不礙還無慚子猷興都盡剡溪間  
依韻和劉察院送客迴過淇水馬上有作

車騎踏春堤脩然思如濯望驄人自避解凍魚方樂  
流古樹根跨岸枯薪釣煙雲淡淡天嫩綠生叢薄

不知夢

夢中不知夢但謂平常時相與共笑言馬問久別離  
餽贈若有獲既覺乃失之人生在世間何異夢寐為

邾城道中

行行溪水邊鏡碧不可唾安知有沫流草木多偃卧潭  
鳥瞥復沒灘沙淨如簸不獨荊州民居險頸癭大

汝州後池聽水

春水泉脉動分巖臨澗源津津出石齒泠泠縈竹根猶  
如野雲翠復落郡池喧心靜意自適不知朝市煩

夢覺

夕夢多夢之覺來遂成憶憶予生平時事往無一得信  
若茲夢寐豈不見顏色復存來告言言虛音匪默是覺

曷為真覺夢彌以惑

衛州通判趙中舍

我久在河內頗知衛風俗沙田多種稻野飯僅脫粟況  
聞別乘至佇望大河曲飲罷何以贈柔條路傍綠

答江十鄰幾

蔡州雖非遐作書素所懶春風領燕來得君詞款款燕  
迴須在秋此報莫言緩何日見嵇康重彈廣陵散

夏日對雨偶成寄韓仲文昆弟

日日城頭雨還添湖上波窓中人自聽門外潦應多不  
畏車生耳惟愁麥作蛾吾廬無所有頻看壁間梭

遠山

插雲千萬重一望不可暫前嶺與後峰翠色濃復淡

蓮塘

不畏塘雨急細葉自相遮紋禽忽驚去衝落波上霞

送謝師厚歸南陽

竹館陰以風洒水坐猶熱念子遠歸時焦煙起車轍落

日原上微鳥樓人欲別我心明月在相照異盈缺

蚤至潁上縣

夜發曉未止獨行淮水西明知寒草露暗濕瘦驄蹄半  
減竹林火數聞茅屋雞秋天畏殘暑不為月光迷

道中謝晏相公寄酒

潁泥墨印幾壺綠將慰窮途阮步兵一夜臨流對明月  
舉杯愁聽鴈來聲

新鴈

塞鴈與寒來夜落汀洲宿泊船人不寐月下聲相續

依韻和宴相公

微生守賤貧文字出肝膽一為清潁行物象頗所覽泊  
舟寒潭陰野興入秋蒹因吟適情性稍欲到平淡方將  
挹溟海器小已激灩廣流不拒細愧怍獨慊慊疲馬去  
軒時戀嘶芻秣減茲繼周南篇短橈寧及艫試知不自  
量感涕屢揮摻

合流值雨與曹光道飲



秋風嘯哀林秋雨阻歸客賴有故時交舉杯聊岸幘談  
兵與論文曾不涉陳迹必竟無所施醉去思泉石

陽翟縣城凝嵩亭

西北望嵩色憶上太室時陟彼已不淺坐此安能知誰  
棲絕壁下但見前峯危正與曩未異目存迹焉追

與道損仲文子華陪泛西湖

冰消湖已綠渺渺鴨頭春船學吳兒刺吟稀楚老新對  
山憐去鳥隔樹識游人誰念滄江上風柔採白蘋

送玉汝

談笑去拘忌乃見相與深風騷數往返叔季鮮知音  
明日車馬北豈不動離襟春風靡蕪綠別恨生遙岑

送王判官之江陰軍幕

往時初渡江頗愛江南美誰知坐卧間思及煙波裏  
絮逐魴魚繁鼓添蕤線紫君行語風物到日應相似

泛舟和持國

綠源去未窮夾岸樹濛濛弱蔓低侵水殘芳不隱叢  
浣

衣思越婦折筍擬江童薄暮迴船處潭魚動鏡中

七月二十一夜聞韓玉汝宿城北馬舖

暗樹秋風擺葉鳴桃枝竹簟冷逾清孤燈淡淡短亭客  
半夜蕭蕭聞雨聲

追詠崔奉禮小園

前此訪君時已觀堂宇邃安知中屏開自有幽林致花  
牽巖桂紅石擘雲根翠正當秋風來不見搖落意

送韓仲文奉使

往使匈奴國持節宣辭遙朔風正苦寒風沙與雪飄燕  
山何處是漢銘應已銷前車渡冰河後騎鳴金鑣行行  
至穹廬尊我不敢囂玉爵親獻酬名裘進狐貂禮成復  
命日苑抑舒楊條

范景仁席中賦葡萄

朱盤何累累紫乳封霜厚今為馬谷繁昔釀梁州酒乃  
知西土珍漢使傳應久

夜聽鄰家唱

夜中未成寐鄰歌聞所稀想像朱唇動髣髴梁塵飛悞  
節應偷笑竊聽起披衣須臾曲已終窓月存餘暉

送丹陽新守李國博歸洪州

蔡水冬不枯惟愁夜冰結歸船及暖下窮臘未飛雪淮  
潁地漸偏川上雲常泄幾日接春波南風楚江徹

寄題滁州醉翁亭

琅玕谷口泉分流漾山翠使君愛泉清每來泉上醉醉  
纓濯潺湲醉吟異憔悴日暮使君歸野老紛紛至但留

山鳥啼與伴松間吹

送陶太博通判廣信軍

平時易水頭不復起邊愁壯士去已久寒波空自流臨  
塘遺鷺羽隔戍見羶裘半似江南美軍和賸宴游

朧月

夜晴初見月雲薄未分明高樹尚無影遠鴻時有聲下  
堦嫌履濕閉戶認苔生寂寂牆陰暝更長已漸傾

寒食

墳塚徧青山高低占原谷向來路已荒今迷問樵牧涉  
水到雲林隔岡聞近哭沃酒白楊下悲風何颼颼雨止  
黎園殘鳩聲在茅屋

春風

常愁春雲低誰料春風惡搖扇無定響折翰時聞落吹  
花擁細草送雨來高閣江燕倚身輕逆飛前復却

送侯寺丞知鞏縣

侯洛人

伊洛合河流正臨歸鞏路崖壁人畏崩芹泥岸長固山

迴邑郭見馬入雲煙暮宰茲雖所淹況與鄉黨附

金明池遊

三月天池上都人袷服多水明搖碧玉岸響集靈鼉  
畫舸龍延尾長橋霓飲波苑花光粲粲女齒笑瑳瑳行  
袂相朋接游肩與賤摩津樓金間米幄殿錦文窠挈榼車傍  
綴歸郎馬上歌川魚應望幸幾日翠華過

和應之還邑道中見寄

向老思舊交欲見恨無翅前時君來都欣喜乃一至亦



既勤我懷酌酒去拘忌自從離洛陽此會無三四謝尹  
最賢豪已嗟存沒異因馴馬上篇遂寫相逢意

送韓仲文知許州

孰不為太守所榮歸故鄉僚官詫舊識邸吏窺新章前  
去別馬上今仰立道傍野老拜車塵里人待壺漿至家  
頃麓美謁壠雲日光盛事難盡書且舉國門觴

送崔黃臣寺丞宰臨海

補官桐廬時已飽嚴陵釣進吏六百石又得臨海嶠因

之論出處足以見風調洪潮可登觀萬里漲川竅憑君  
能賦才庶或窮其妙

宿磯上港

夜深風浪息月正在南斗遠水生白煙踈螢出荒莽照  
蟹屢熟新張魚未發筍獨能憐野客游宦意何有

宣州環波亭

冒暑駐輪轂徘徊北濠上棟宇起中央芙蓉生四向今  
吾太守樂慰此都人望雨從昭亭來水入句溪漲蜻蜒

立欄角朱鯉吹荷浪岸木影下布水鳥時引吭心閒不  
競物興發每傾釀暮詠醉歸陪車知幾兩

泊姑熟江口邀刁景純相見

尾生信女子抱柱死不疑吾與丞相約安得不顧期徘徊  
大江側念此親相知欲留時已晚欲去情難持引領  
望軒車豈能慰我思願聞下士禮無曰屈非宜

見牧牛人隔江吹笛

朝與牛出牧晝與牛在野日暮穿林歸長笛初在髀面

尾騎且吹音響未成雅隨風散遠近舉調任高下我方  
江上來平溜若鏡瀉悠悠經醉耳亦足發蕭洒苟能和  
人心豈必奏韶夏南箕成籛揚寺孟詵哆我今留此  
詩誰謂馬喻馬

與夏侯繹張唐民遊蜀岡大明寺

秋葉已多蠹古原看更荒廢城無馬入破冢有狐藏寒  
日稍清迥羣山分潞蒼田衣指白水此下是雷塘

和永叔中秋夜會不見月酬主舍人

主人待月敞南樓  
淮雨西來斗變秋  
自有嬋娟侍賓榻  
不須迢遞望刀頭  
池魚暗聽歌聲躍  
蓮的明傳酒令優  
更愛西垣舊詞客  
共將詩興壓曹劉

哀王孫

泗水赤龍將欲飛  
瘦蛟在泥雲未歸  
冰蠶煮灰寒水擊  
長大王孫抱饑色  
誰知適自下鄉來  
日是可哀猶未食  
菰飯白漿持與君  
王孫王孫何復云

使風

跨下橋南逆水風十幅蒲帆彎若弓淮波帶日魚鱗紅  
岌岌飛上北斗中龜山始撞人定鐘岸草澀澀鳴秋蟲

昭信淮上

清淮渺然去白浪勢如奔同發已先遠獨行將向昏洲  
長寧辨路夜泊偶依村燈光稍覺亂應聞人語喧

丘家渡早發

曲穎若秋蛇屈盤鱗甲活問戍得耕人拾魚逢祭獮草  
窠殘野燒樹挂經流沫百里相對看頻行媿迂濶

招隱堂寄題樂郎中

日哦招隱詩時誦歸田賦未嘗見達人勇拋冠冕去今  
聞緱山陰身退効疏傳一旦從犢車歡言友田父復來  
釣澗邊誰問袁公路

弟著作宰南陵

新買紫騮馬欲歸清弋江去彈琴鴈獨來認舄鳬雙索  
實收盈筐濃醅熟滿缸弟兄相憶否風燭舊西窓

登采石山上廣濟寺

船從山下過直上見僧軒繫纜登磯石緣崖到寺門短  
籬遮竹養危路踏松根却看滄江底帆歸煙外昏

依韻和吳季野馬上口占

谿頭三月草菲菲城畔春游惜醉稀莫信杜鵑花上鳥  
人歸猶道不如歸

八月十五日夜東軒

隔竹已見月清光度谿來移影上素壁與我相徘徊是  
夜正中秋天地霧露開人疑玉兔出藥杵不生埃嫦娥



倚冰輪豔色若自媒他夕豈不好物意為之推

秋日家居

移榻愛晴暉脩然世慮微懸蟲低復上關雀墮還飛相  
趨入寒竹自收當晚闌無人知靜景苔色照人衣

潘歙州話廬山

潘侯話廬山落落尤可伏初云江上來遠見峯中瀑捨  
舟到雲外觀瀑已高麓往往逢平田攢攢愛深木竹門  
懸徑微源水陰藤覆坐石浸兩腋炎膚起芒粟夕陽穿

萬峯高下相出縮尋常杳不分  
但被煙嵐畜絕頂水底  
花開謝向淵腹攬之不可得  
滴瀝空在掬夜昏投僧居  
孤燈望溪曲忽聞清磬音  
漸近幽林屋

秋日村行

谿霧晝晝收山村夜初晦  
饑禽來往飛遠樹青紅碎  
原上楚牛牧屋頭吳婦碓  
雞肥酒已熟野老邀同輩

寄送吳公明屯田通判秦州

一聞春禽婆餅焦竹林山木生  
蕭條憶君將向洛門去

胡馬無塵塞路遙將軍本是漢丞相玉帳坐辨牙旗梟  
白面書生有肝膽少年曾過咸陽橋今雖老病由廬巷  
為報緩制秦兵驕

宣州雜詩

昭亭萬仞山古廟半山間  
賽雨使君去釣潭漁父閒  
巖肥巖向日竹暗壠連關  
北望高樓上南飛鳥自還

其二

高齋謝公歿此地即危樓  
不改窓中岫誰停川上舟  
座

陰緣薜荔城，暝笑鵙鷗萬井曉。煙合素霓橫樹頭。

送石昌言舍人使可汗

燕然山北大單于，漢家皇帝與璽書。持書大夫腰金魚，  
飛龍借馬出國都。邊沙九月草已枯，草上霜花如五銖。  
白裘貂帽著不暖，莽莽黃塵車欵欵。野廬邊月出隴來，  
風靜天遙鴈聲短。聞到蜀庭尤苦寒，譚言揉耳不譏彈。  
公於是時已觀禮，踏雪再拜辭可汗。

送吳辯叔知鞏縣

言為西邑宰本是洛陽人送驛往歸魏迎車來入秦山  
川成鞏固陵廟壯威神好學河陽政栽花作縣春

送余少卿知睦州

青山峽裏桐廬郡七里灘頭太守船雲霧未開藏宿鳥  
坡原將近見燒田養茶摘藥新春後種橘收包小雪前  
民事蕭條官政簡家書時問雪谿邊

依韻和永叔久在病告近方赴直道懷見寄

浴堂深殿近皇居秋夕詞臣直宿初宮女穿針爭落月

官奴持燭看殘書萬家乞巧心無盡斜漢飛光望有餘  
枕上江山夢猶熟五更寒雨過簾疎

送李端明知河中府

才業人終服聰明帝所聞來希段干木去識大馮君金  
絡鳴津口朱旗點鴈羣山河虞舊國簫鼓漢橫汾古堞  
臨秋月高樓等白雲應同羊叔子綏帶隔囂氛

覽顯忠上人詩

昔讀遠公傳頗聞高行僧廬山將欲雪瀑布結成氷尋

迹數百載歷危千萬層師來笑賈島只解詠嘉陵

蒙谷

茗園葱蒨與山籠一夜驚雷發舊叢五馬留連未能去  
土囊深處路微通

送張山甫秘校歸緱氏

去年來折桂今年來娶婦得意春風前還家寒食後蓬  
巷聞雞犬藤花蔭井臼緱氏白醪醇重酌高堂壽

送江西轉運馮廣淵學士

五月江南行南風江惡逆乘潮雖有信不過湓城去船  
經香鑪峯峯前須暫住三年少尹勞始得看瀑布到官  
未必閒舉察憂財賦迴思廬山傍塵土已生慮豫章滕  
王閣無忘一登顧

送董察推赴江寧

金陵從事去不歎食無魚尺鯉日登俎故鄉時得書衰  
荷摘短袂秋蘚曳長裾若見公府問年來懶更踈

寄致仕余少卿



仕苦戀朝廷多為老所逼朝廷雖愛賢不欲竭其力君  
歸頗得宜湖上遂偃息人事當置之自可樂胸臆

正仲往靈濟廟觀重臺梅

玉盤疊捧谿女歸魚鱗作室待水嬉竹間山鬼入夜啼  
古廟久閉誰啓扉屈原憔悴江之汭芙蓉木蘭託興微賈  
誼未召絳灌擠香艸嘉禾徒菲菲貧無半辭助訶譏因  
風幸賴相因依

石倉歷代詩選卷一百四十一

# 欽定四庫全書

集部

石倉歷代詩選卷四十六

二至

詳校官庶吉士臣范逢恩

侍讀臣孫球覆勘

總校官進士臣朱鈐

校對官中書臣方大川

謄錄監生臣王銓

欽定四庫全書

石倉歷代詩選卷一百四十二

明 曹學佺 編

宋詩十九

王安石

耿天隲著作自烏江來余逆沈氏妹于白鷺洲  
遇雪作此詩寄天隲

朔風積夜雪明發洲渚淨開門望鍾山松石皓相映故人

過我宿未盡躋攀興而我方渺然長波一歸艇欸段庶  
可策柴荆當未暝與子出東岡牆西掃新徑

示元度

今年鍾山南隨分作園囿鑿池構吾廬碧水寒可漱溝  
西雇丁壯擔土為培塿扶疎三百株蒔棟最高茂不求  
鵲鵲實但取易成就老來厭世語深卧塞門實更待春  
日長黃鸝弄清晝

杏花

石梁度空曠茅屋臨清炯俯窺嬌嬈杏未覺身勝影媽  
如景陽妃含笑墮宮井怡悵有微波殘粧壞難整

仲明父不至

月出映溝坻烟升隱墟落寒魚占窟聚暝鳥投枝泊亭  
臯閉晚市隴首歸新穫佇子終不來青燈耿林壑

與望之至八功德水

念方與子違懍懍夜不眠起視明星高整駕出東阡聊  
為山水遊以寫我心恂知子不餽糟相與酌雲泉

要望之過我廬

念子且行矣要子過我廬汲我山下泉煮我園中蔬知  
子充德機不忍釣我魚食罷往遊觀鱖鰕藻與蒲豈魚  
有此樂而我與子踈擊壤謠帝力自得以為娛

兩山間

自余營北渚數至兩山間臨路愛山好出山路多難山  
花如水淨山鳥與雲閒我欲別山去山仍勸我還祇應  
身後塚亦是眼中山

新花

老年少忻豫況復病在牀汲水置新花取慰此流芳流  
芳祇須臾我亦豈能長新花與故吾已矣兩可忘

示寶覺

宿雨轉欹煩朝雲擁清迴蕭蕭碧柳軟脉脉紅蕖靚默  
卧如有懷荒乘豈無興幽人適過我共取牆陰徑

定林寺

衆木凜交覆孤泉靜橫分楚老一枝筇於此傲人羣城

市少美蔬想今困煖焚且憑東北風持寄嶺頭雲

獨卧有懷

午鳩鳴春陰獨卧林壑靜微雲過一雨淅瀝生晚聽紅  
絲紛在眼流芳與時競有懷無與言佇立鍾山暝

秋早

暮尋蔡墩西獨覺秋尚早山路葩草繁野田風日好禪  
林鳥未泊經屋塵初掃蠻藤五花簞復足休吾老

上南岡



暮塢屋荒涼寒陂水清淺捐書息微倦委轡隨小蹇偶  
攀楊柳枝却望青青巘幽尋復有興未覺西林晚

送李屯田守桂陽

泊船香爐峯始與子相識寄書邦江上詒我峯下石緣  
以湘水竹攜提與南北永懷故人歡不願百金易追思  
少時事俛仰如一夕老矣無所為空知念疇昔常思一  
杯酒要子相解釋出門事紛紛歸卧意還卻聞當上湓  
水持詔守嶺阨方為萬里別執手先慘戚茲遊信浩蕩

山水多所得為我語香爐風塵每相憶

雜詠三首

懷王自墮馬賈傳至死悲古人事一職豈敢苟然為哭  
死非為生吾心良不欺滔滔聲利間絳灌亦何知

其二

先生善鼓瑟齊國好吹竽操竽入齊人雅鄭亦復殊豈  
不得祿賜歸卧自歛歔寥寥朱絲絃老矣誰與娛

其三

商陽殺三人每輒不忍視亦云食君食報禮當如此波  
瀾吹九州金石安得止永懷南山阿慷慨中夜起

即事三首

我起影亦起我留影逡巡我意不在影影長隨我身交  
游義相好骨肉情相親如何有乖睽不得同苦辛

其二

昏昏白日卧皎皎中夜愁明月入枕席涼風動衾幃  
蟬相鳴悲上下無時休徒能感我耳顧爾安知秋

其三

日月隨天旋疾遲與天謀寒暑自有常不顧萬物求蜉  
蝣蔽朝夕蟪蛄疑春秋眇眇上古厯回環今幾周

寄二弟時往臨川

蕭條冬風高吹我冠上霜我行歲已寒悲汝道路長持  
以犬馬心千里不得將使汝身百憂辛苦冒川梁青燈  
照詩書仰屋涕數行不有親戚思詎知遠游傷

西風

少年不知秋喜聞西風生老大多感傷畏此蟋蟀鳴況  
乃捨親友抱病獨遠行中夜卧不周惻惻感我情起視  
天正昏弱雲亂縱橫飄飄霰雪集不復星斗明時節忽  
如此重令壯心驚諒無同憂人樽酒安可傾

送李宣叔倅漳州

閩山到漳窮地與南越錯山川鬱霧毒瘴癘春冬作荒  
茅篁竹間蔽虧有城郭野花開無時蠻酒特可酌窮年  
不到客誰與分杯杓朝廷尚賢俊磊砢充臺閣君獨萬

里去識者為不樂余聞君子居自可救民瘼苟能澤及  
人得地無美惡蕉黃荔子丹味勝楂梨酢逢衣比多士  
往往出丘壑從容與談笑豈不慰寂寞太守好觴詠嘉  
賓應在幕想即有新詩流傳至京洛

黃菊有至性

團團城上日秋至少光輝積陰欲滔天況乃草木微黃  
菊有至性孤芳犯羣威采采霜露間亦足慰朝饑

少年見青春

少年見青春萬物皆嫵媚身雖不飲酒樂與賓客醉一  
從鬢上白百不見可喜心腸非故時更覺日月駛聞歡  
已倦往得飽還思睡春歸只如夢不復悲憔悴

散髮一扁舟

散髮一扁舟夜長眠屢起秋水瀉明河迢迢藕花底愛  
此露的皪復憐雲綺靡諒無與歌絃幽獨亦可喜

今日非昨日

今日非昨日昨日已可思明日異今日如何能勿悲當

門五六樹上有蟬鳴枝朝聽尚壯急暮聞已衰遲仰看  
青青葉亦復少華滋萬物同一氣固知當爾為我友南  
山居笑談解人頤分我秋柏實問言歸何時衣冠污窮  
塵苟得猶苦饑低徊歲已晚恐負平生期

騏驎在霜野

騏驎在霜野低回向衰草入櫪聞秋風悲鳴思長道黃  
金作鞭轡粲粲空外好人生貴得意不必恨枯槁

秋庭午吏散



秋庭午吏散余亦歸息偃豈無嘉賓客欲往心獨懶北  
窓古人篇一讀三四反悲哉不蚤計失道行晚晚

叔孫通

先生秦博士秦禮頗能熟量主欲有為兩生皆不欲草  
具一王儀羣豪果知肅黃金既徧賜短衣亦已續儒術  
自此凋何為反初服

田單

湣王萬乘齊走死區區燕田單一即墨掃敵如風旋舞

鳥怪不測騰牛怒無前飄飄樂毅去磊砢功名傳掘葬  
與剽降論乃媿儒先深誠可奮士王蠋豈非賢

飯祈澤寺

駕言東南遊午飯投僧館山白梅藥長林黃柳芽短筇  
簞沙際來畧約桑間斷春映一川明雪消千壑漫魚隨  
竹影浮鳥誤人聲散翫物豈能留干時吾自懶

牧笛

綠草無端倪牛羊在平地芊綿杳靄間落日一橫吹超

遙送逸響澶漫寫真意豈比賣餠人吹簫販童穉

田漏

占星昏晚中寒暑已不疑田家更置漏寸晷亦須知汗  
與水俱滴身隨陰屢移誰當哀此勞徃徃奪其時

招同官遊東園

青青石上蘂霜至亦已凋冉冉水中蒲爾生信無聊感  
此歲云晚欲懽念誰邀嘉我二三子為回東城鑣幽菊  
尚可泛取魚繫榆條毋為百年憂一日以逍遙

九日隨家人遊東山遂東園

暑往詎幾時涼歸亦云暫相隨東山樂及此身無憾聊  
回清池施更伏荒城檻采采黃金花持杯為君泛

崑山慧聚寺次孟郊韻

僧蹊蟠青蒼莓苔上秋牀露翰饑更清風飈遠亦香掃  
石出古色洗松納空光久遊不忍還迫近冠蓋場

顧林亭

野王所  
居也

寥寥湖上亭不見野王居平林豈舊物歲晚空扶疎自

古聖賢人邑國皆丘墟不朽在名德千秋想其餘

寒穴

神農冽冰霜高穴與雲平空山渟千秋不出鳴咽聲山  
風吹更寒山月相與清北客不到此如何洗煩醒

純甫出釋惠崇畫要余作詩

畫史紛紛何足數惠崇晚出吾最許旱雲六月漲林丘  
移我脩然墮洲渚黃蘆低摧雪翳土鳬鴈靜立將儔侶  
往時所歷今在眼沙平水澹西江浦暮氣沈舟暗魚罟

敬眠嘔軋如聞擄頗疑道人三昧力異域山川能斷取  
題南康晏史君望雲亭

南康父老傳史君疾呼急索初不聞未嘗遣汲谷簾水  
三歲只望香爐雲雲徐無心澹無滓史君恬靜亦如此  
颯然一去掃遺陰便覺歎煩悵千里歸田負戴子與妻  
圃蔬園菓西山西出門亭臯百頃綠望雲纔喜動春犁  
我知新亭望雲好欲斲比隣成二老莫嫌雞黍數往來  
為報襄陽德公嫂

寄蔡氏女子二首

建業東郭望城西  
堠千嶂承宇百泉遶  
雷青遙遙兮纒  
屬綠宛宛兮橫逗  
積李兮縞夜崇桃  
兮炫晝蘭馥兮衆  
植竹娟兮常茂柳  
薦綿兮含姿松偃  
蹇兮獻秀鳥跂兮  
下上魚跳兮左右  
感時物兮念汝遲  
汝歸兮攜幼

我營兮北渚有懷兮歸女  
石梁兮以苦葢綠陰陰兮承  
宇仰有桂兮俯有蘭  
嗟汝歸兮路豈難望  
超然之白雲  
臨清流而長嘆

卷一百四十二  
寄朱昌叔

西安春風花幾樹花邊飲酒今何處一杯塞上看黃雲  
萬里寄聲無鴈去世事紛紛洗更新老來空得滿衣塵  
青山欲買江南宅歸去相招有此身

移桃花示俞秀老

舍南舍北皆種桃東風一吹數尺高枝柯薦綿花爛熳  
美錦千兩敷亭皋晴溝漲春周遭綠俯視紅影移漁舸山  
前邂逅武陵客水際髣髴秦人逃攀條弄芳畏晚晚已



見泰雪盤中毛仙人愛杏令虎守百年終屬樵蘇手我  
衰此果復易殘蟲來食根那得久瑤池紺色誰見有更  
值花時且追酒君能酩酊相隨否

明妃曲

明妃初出漢宮時淚濕春風鬢脚垂低回顧影無顏色  
尚得君王不自持歸來却怪丹青手入眼平生幾曾有  
意態由來畫不成當時枉殺毛延壽一去心知更不歸  
可憐著盡漢宮衣寄聲欲問塞南事只有年年鴻鴈飛

桃源行

望夷宮中鹿為馬秦人半死長城下避時不獨商山翁  
亦有桃源種桃者此來種桃經幾春採花茹實枝為新  
兒孫生長與世隔雖有父子無君臣漁郎漾舟迷遠近  
花間相見因相問世上那知古有秦山中豈料今為晉  
聞道長安吹戰塵春風回首一霑巾重華一去寧復得  
天下紛紛限南北

出鞏縣

昭陵落月煙霧昏篝火度谷行山根投鞭委轡涉數村  
寤出鞏縣城東門向來宮闕不可見但有洛水流荒園

陰漫漫行

愁雲怒風相追逐青山滅沒滄江覆少留燈火就空牀  
更聽波濤圍野屋憶昨踏雪度長安夜宿木瘤還苦寒  
誰云當春便妍暖十日八九陰漫漫

一日歸行

賤貧奔走食與衣百日奔走一日歸平生歡意苦不盡

正欲老大相因，因依空房蕭瑟。施繡帷、青燈半夜，哭聲稀。  
音容想像，今何處？地下相逢，果是非。

憶北山送勝上人

蒼藤翠木，江南山澗，激激流水。兩山間、山高水深，魚鳥樂  
車馬跡絕人長閒。雲埋樵聲，隔蔥蒨，月弄釣影，臨潺湲。  
黃塵滿眼，衣可濯，夢寐惆悵，何時還。

飛鴈

鴈飛冥冥時，下泊稻梁雖少。江湖樂人，生何必慕輕肥。

辛苦將身到沙漠漢時蘓武與張騫萬里生還值偶然  
丈夫許國當如此男子辭親亦可憐

明州錢君倚衆樂亭

侯君幕府開東部名高海曲人知慕艤船談笑政即  
成洗滌山川作嘉趣平泉浩蕩銀河注想見明星弄  
機杼載沙築成天上路投虹為橋取孤嶼掃除荆棘  
水中央碧瓦朱甍隨指顧春風滿城金版舫來看置  
酒新亭上百女吹笙綠鳳悲一夫伐鼓靈鼉壯安期

羨門相與遊方丈蓬萊不更求酒酣忽跨鯨魚去陳  
迹空令此地留

孤城

孤城回望距幾何記得好處常經過最思東山煙樹色  
更憶南湖秋水波百年顛倒如夢寐萬事乖隔徒悲歌  
應須飲酒不復道今夜江頭明月多

和中甫兄春日有感

雪釋沙輕馬蹄疾北城可遊今暇日濺濺溪谷水亂流

漠漠郊原草爭出嬌梅過雨吹爛漫幽鳥迎陽語啾唧  
分香欲滿錦樹園剪綵休開寶刀室胡為我輩坐自苦  
不念茲時去如失飽聞高逕動車輪甘卧空堂守經帙  
淮蝗蔽天農久餓越卒圍城盜少逸至尊深拱罷簫韶  
元老相看進刀筆春風生物尚有意壯士憂民豈無術  
不成歡醉但悲歌回首功名古難必

到郡與同官

時倅  
舒州

瀉碧沍沍橫帶郭浮蒼靄靄遙連閣草木猶疑夏鬱葱

風雲已見秋蕭索  
荒歌野舞同醉醒  
水果山肴互斟酌  
自嫌多病少懽顏  
獨負嘉賓此時樂

僧德殊家水簾求余詠

淙淙萬音落石巔  
皎皎一派當簷前  
清風高吹鸞鶴唳  
白日下照蛟龍涎  
浮雲粧額自能卷  
缺月琢鉤相與縣  
朱門試問幽人價  
翡翠鮫綃不直錢

復至曹娥堰寄剡縣丁元珍

溪水渾渾來自北  
十山抱水清相射  
山深水急無艇移



欲從故人安可得故人昔日此水上樽酒扁舟慰行役  
離心自醉不復飲秋果寒花空滿席今年却坐相逢處  
惆悵難求別時跡可憐溪水自南流安得溪船問消息

半山春晚即事

春風取花去酌我以清陰翳翳陂路靜交交園屋深牀  
敷每小息杖屨或幽尋惟有北山鳥經過遺好音

露坐

露坐看滿月飄然風度荷珠跳散作點金湧合成波老

失芳歲易靜知良夜多陵秋久不寐吾樂豈絃歌

定林

漱甘涼病齒坐曠息煩襟因脫水邊屨就數巖上衾但  
留雲對宿仍值月相尋真樂非無寄悲蟲亦好音

雁

北去還為客南來豈是歸倦投空渚泊飢帖冷雲飛垣  
柵雞長煖溝池驚自肥憐渠不知此更墮野人機

與道原過西莊遂遊寶乘

親朋會合少時序感傷多勝踐聊為樂清談可當歌微  
風淡水竹淨日暖煙蘿興極猶難盡當如薄暮何

宿北山示行詳上人

都城羈旅日獨許上人賢誰為孤峯下還來宴坐邊是  
身猶夢幻何物可攀緣坐對青燈落松風咽夜泉

即事

徑暖草如積山晴花更繁縱橫一川水高下數家村靜  
憩雞鳴午荒尋犬吠昏歸來向人說疑是武陵源

壬辰寒食

客思似楊柳春風千萬條更傾寒食淚欲漲冶城潮  
巾髮雪爭出鏡顏朱早凋未知軒冕樂但欲老漁樵

發館陶

促轡數殘更似聞雞一鳴春風馬上夢沙路月中行  
笳鼓遠多思衣裘寒始輕稍知田父穩燈火閉柴荆

長垣

攬轡長垣北貂寒不自持霜風急鼓吹煙月暗旌旗  
騎

火流星點牆桑亞戟枝柴荆掩春夢誰見我行時

宿雨

綠攪寒蕪出紅爭暖樹歸魚吹塘水動鴈拂塞垣飛宿  
雨驚沙盡晴雲送漏稀却愁春夢短燈火著征衣

將次洺州憩漳上

漠漠春風裏茸茸綠未齊平田鷗散啄深樹馬迎嘶地  
入河流曲天隨日去低高城已在眼聊復解輕齋

和棲霞寂照庵僧雲渺

蕭然一世外所樂有誰同  
宴坐能忘老齋蔬不過中  
無心為佛事有客問家風  
笑謂西來意雖空豈病空

春日

冉冉春行暮  
非非物競華  
鶯知求舊友  
燕不背貧家  
室有賢人醞  
門無長者車  
醉眠聊自適  
歸夢到天涯

寄深州晁同年

秀色歸荒隴  
新聲換鬣毛  
日催花藥急  
雲避鴈行高  
駐馬旌旗暖  
傳觴鼓吹豪  
班春不知負  
短髮為君搔

自白土村入北寺

木杪田家出城陰  
野逕分溜渠行碧玉畦  
稼卧黃雲薄  
槿胭脂染深荷  
水麝焚夕陽人不見  
雞鶩自成羣

其二

雨過百泉出秋聲連衆山  
獨尋飛鳥外時渡亂流間  
坐石偶成歇看雲相與還  
會須營一畝長此聽潺湲

崑山慧聚寺次張祐韻

峯嶺互出沒江湖相吐吞  
園林浮海角臺殿擁山根  
百

里見漁艇萬家藏水村地偏來客少幽興祇桑門

遊杭州聖果寺

登高見山水身在中央下視樓臺處空多樹水蒼浮  
雲連海氣落日動湖光偶坐吹橫笛殘聲入富陽

遊北山

攬轡出東城登臨目暫明煙雲藏古意猿鶴弄秋聲客  
坐苔紋滑僧眠樾蔭清賞心殊未已山下日西榮

秣陵道中口占



經世才難就田園路欲迷  
慙慙將白髮下馬照青溪

別方劬秘校

迢迢建業水中有武昌魚  
別後應相憶能忘數寄書

江上

村落家家有濁醪青旗招客解征袍  
春雲似補林塘缺  
野水遙連草樹高  
寄食舟車隨處敝  
行歌天地此身勞  
遲回自負平生意  
豈是明時惜一旄

歲晚懷古

先生歲晚事田園魯叟遺書廢討論  
問訊桑麻憐已長  
按行松菊喜猶存  
農人調笑追尋壑  
耜子歡呼出候門  
遙謝載醪祛惑者  
吾今欲辯已忘言

次韻酬龔深甫

握手東岡雪滿蓼  
後期惆悵老吳蠶  
芳辰一笑真難值  
暮齒相思豈久堪  
他日杜詩傳渭北  
幾時周宅對漳南  
百年邂逅能多少  
且可勤來共草庵

送程公闢得謝歸姑蘇

東歸行路嘆賢哉  
碧落新除寵上才  
白傅林塘傳畫去  
吳王花鳥入詩來  
唱酬自有微之在  
談笑應容逸少陪  
除此兩翁相見外  
不知三徑為誰開

送項判官

斷蘆洲渚落楓橋  
渡口沙長過午潮  
山鳥自呼泥滑滑  
行人相對馬蕭蕭  
十年長自青衿識  
千里來非白璧招  
握手祝君能彊飯  
華簪常得從雞翹

雨花臺

盤互長干有絕陁并包佳麗入江亭新霜浦澈綿綿淨  
薄晚林巒徃徃青南上欲窮牛渚怪北尋難忘草堂靈  
便輿却走垂楊陌已戴寒雲一兩星

次韻元厚之平邊慶捷

朝廷今日四方功先以招懷後壹戎邊地馬牛歸隴底  
漢人煙火起湟中投戈更講諸儒術免胄爭趨上將風  
文武佐時慚吉甫宣王征伐自膚公

次韻宗次道憶太平早梅

大梁春費寶刀催不似湖陰有早梅今日盤中看翦綵  
當時花下就傳杯紛紛自向江城落杳杳難隨驛使來  
知憶舊遊還想見西南枝上月徘徊

和曾子翊授舒掾之作

皖城終歲靜如山府掾應從到日間一水碧羅裁繚繞  
萬峯蒼玉刻孱顏舊遊筆墨苔今老浪走塵沙鬢已斑  
攬轡羨君橋北路春風枝上鳥關關

次韻微之即席

釀成吳米野油囊却愛清談氣味長  
閒日有僧來北阜  
平時無盜出南塘  
風亭對竹酌孤峭  
雪徑尋梅認暗香  
江水中濡應未變  
一杯終欲就君嘗

寄友人二首

萬里書歸說我愁  
知君不忘北城幽  
一篇封禪才難學  
三畝蓬蒿勢易求  
欲與山僧論地券  
願為隣舍事田疇  
應須急作南征計  
漠北風沙不可留

其二

水邊幽樹憶同攀  
曾約移居向此間  
欲語林塘迷舊徑  
却隨車馬入他山  
飛花著地容難治  
鳴鳥窺人意轉閒  
物色可歌春不返  
相思空復慘朱顏

酬淨因長老樓上翫月見懷有疑君魂夢在清  
都之句

道人心與世無求  
隱几蕭然在此樓  
坐對高梧傾曉月  
看翻清露洗新秋  
登臨更欲邀元亮  
披寫還能擬惠休  
顧我不知天上樂  
虛疑昨夜夢仙遊

送沈康知常州

作客蘭陵迹已陳，為傳謠俗記州民。  
溝塍半廢田疇薄，廚傳相仍市井貧。  
常恐勞人輕白屋，忽逢佳士得朱輪。  
慇懃話此還惆悵，最憶荆溪兩岸春。

太湖恬亭

檻臨溪上綠陰圓，溪岸高低入翠微。  
日落斷橋人獨往，水涵幽樹鳥相依。  
清遊始覺心無累，靜處誰知世有機。  
更待夜深同徙倚，秋風斜月釣船歸。



北山有懷

香火因緣寄此山  
主恩投老更人間  
傷心躑躅岡頭路  
明日春風自往還

定林

窮谷經春不識花  
新松老柏自欹斜  
殷勤更上山頭望  
白下城中有幾家

與道原過西莊遂遊寶乘

周顒宅作阿蘭若  
婁約身歸窳堵坡  
蕙帳銅屏皆舊事

飄然陳迹在松蘿

同熊伯通自定林過悟真

與客東來欲試茶  
倦投松石坐欹斜  
暗香一陣連風起  
知有薔薇澗底花

鍾山晚步

小雨輕風落棟花  
細紅如雪點平沙  
槿籬竹屋江村路  
時見宜城賣酒家

戲贈段約之

竹柏相望數十楹  
藕花多處復開亭  
如何更欲通南埭  
割我鍾山一半青

入瓜步望揚州

落日平林一水邊  
蕪城掩映祇蒼然  
白頭追想當時事  
幕府青衫最少年

送黃吉父將赴南康官歸金谿

柘岡西路白雲深  
想子東歸得重尋  
亦見舊時紅躑躅  
為言春至每傷心

其二

還家一笑即芳辰好與名山作主人  
邂逅五湖乘興往相邀綿繡谷中春

金陵卽事

水際柴門一半開小橋分路入青苔  
背人照影無窮柳隔屋吹香併是梅

其二

結綺臨春歌舞地荒蹊狹巷兩三家  
東風漫漫吹桃李

非復當時仗外花

烏塘

烏塘渺渺綠平堤堤上行人各有攜  
試問春風何處好  
辛夷如雪柘岡西

城北

青青千里亂春袍宿雨催紅出小桃  
迴首北城無限思  
日酣川淨野雲高

金陵

金陵陳迹老莓苔  
南北遊人自往來  
最憶春風石城塢  
家家桃杏過牆開

和張仲通憶鍾陵

一夢章江已十年  
故人重見想皤然  
祇應兩岸當時柳  
能到春來尚可憐

鍾山即事

澗水無聲繞竹流  
竹西花草弄春柔  
茅簷相對坐終日  
一鳥不鳴山更幽

雨晴

晴明山鳥百般催不待桃花一半開  
雨後綠陰空繞舍  
總將春色付莓苔

日西

日西階影轉梧桐簾卷青山簾半空  
金鴨火銷沈水冷  
悠悠殘夢鳥聲中

禁中春寒

青煙漠漠雨紛紛水殿西廊北苑門  
已著單衣猶禁火

海棠花下怯黃昏

江上

江北秋陰一半開  
晚雲含雨却低回  
青山繚繞疑無路  
忽見千帆隱映來

與北山道人

蒔果疏泉帶淺山  
柴門雖設要常關  
別開小徑連松塢  
祇與隣僧約往還

即席



曲沼融融泮盡漸暖煙籠瓦碧參差人情共恨春猶淺  
不問寒梅有幾枝

送王石甫學士知湖州

吳興太守美如何柳惲詩才未足多遙想郡人迎下擔  
白蘋洲渚正滄波

江寧夾口

落帆江口月黃昏小店無燈欲閉門側出岸沙楓半死  
繫舟應有去年痕

省中沈文通廳事

竹上秋風吹網絲  
角門常閉吏人稀  
蕭蕭一榻卷書坐  
直到日斜騎馬歸

夜直

金爐香盡漏聲殘  
剪剪輕風陣陣寒  
春色惱人眠不得  
月移花影上欄干

試院中

白髮無聊病更侵  
移牀卧竹向秋陰  
朝來鴈背西風急

吹折江湖萬里心

出塞

涿州沙上飲盤桓  
看舞春風小契丹  
塞雨巧和燕淚落  
濛濛吹濕漢衣冠

書汜水關寺壁

汜水鴻溝楚漢間  
跳兵走馬百重山  
如何咫尺商於地  
便有園公綺季閒

其二

沙礫藏春未放來  
荒庭終日守陳芳  
遙憐艸色裙腰綠  
湖寺西南一徑開

懷舊

吹破春冰水放光  
山花澗草百般香  
身閒處處看行樂  
何事低回兩鬢霜

金陵報恩大師西堂方丈

蕭蕭出屋千竿玉  
靄靄當牕一炷雲  
心力長年人事外  
種花移石尚殷勤

別和甫赴南徐

都城落日馬蕭蕭  
雨壓春風暗柳條  
天際歸艎那可望  
只將心寄海門潮

真州東園

十年歷遍人間事  
却遶新花認故叢  
南北此身知幾日  
山川長在淚痕中

遊鍾山

兩山松櫟暗朱藤  
一水中間勝武陵  
午梵隔雲知有寺

夕陽歸去不逢僧

別瀟閣

一溪清瀉百山重風物能留邴曼容  
後夜肯思幽興極月明孤影伴寒松

中茅峯石上徐鉞篆字題名

百年風雨草苔昏尚有當年墨法存  
祇恐終隨嶧碑盡西風吹燒滿秋原

竹窻

竹窻紅覓兩三根  
山色遙供水際門  
只我近知牆下路  
能將屐齒記苔痕

送僧遊天台

天台一萬六千丈  
歲晏老僧攜錫歸  
前程好景解吟否  
密雪亂雲緘翠微

初晴

一抹明霞黯淡紅  
瓦溝時見雪花融  
前山未放曉寒散  
猶鎖白雲三兩峯

天童山溪上

溪水清連樹老蒼  
行穿溪樹踏春陽  
溪深樹密無人處  
唯有幽花渡水香

贈安太師

獨龍岡北第三峯  
逋客歸來老更慵  
敗屋數椽青繚繞  
冷雲深處不聞鍾

石倉歷代詩選卷一百四十二